

1. klassimiik meeqqat atuarfiisa tamarmik pinngitsooratik tuluit oqaasiinik takornartat oqaasiisut atuartitsisalernissaat qularnaarumallugu Meeqqat Atuarfiat pillugu Inatsisartut inatsisaannut nr. 15, 3. December 2012-imeersumut allannguutissamik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Suliniutip tamatuma kinguneranik kalaallit danskillu oqaasiinik atuartitsineq ajornerulersinneqassanngilaq. Allannguut atuutilersinneqassaaq ukiup atuarfiusup 2018-mi aallartinneraniit.

(Inatsisartunut ilaasortaq Nivi Olsen, Demokraatit)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Siullermeerneqarnera

Naalakkersuisut Nivi Olsen Demokraatit qutsavigaat tuluttut pinngitsoorani atuartitaasussaannerup 4. klassimiit 1. klassimut siuartinneqarnissaa siunnersuutigimmagu.

Naalakkersuisut meeqqat atuarfiannik tamarmiusumik minnerunngitsumillu immikkut naqissuserlugu oqaatsinik atuartitsinermik inerisaarusunnerat qularutigineqassanngilaq. Iitsoqqussaralugu oqaatsinik minnerunngitsumillu allamiut oqaasiinik pisinnaasaqarluarneq nunarsuarmi qanillattortuartutut pissusilimmi piginnaanerupput pingaarluinnarlutillu pisariaqarluinnartut – pingaartumik teknologiip ineriartortuartup periarfissiissutigiugassai peqquutigalugit. Eqqaamassavarput oqaatsit inoqatitsinnut qanittumiittunut taamaallaat attaveqaatit atortussaanginnatsigit aammali nunarsuarmioqatitsinnut attaveqarnermut atortussaagatsigit taannalu aqquutigalugu inuppalaartunik pingaarutilinnik atassuteqarfeqalerlutalu qanigisaqalissagatta. Oqaatsit atorlugit eqqarsarsinnaavugut – avatangiisitsinnut, inooqataanermut kiisalu inoqatitsinnut attaveqarnitta isumaanik paasinninnivut ilisimasavullu aqqissortarlugit – tamannalu aqquutigalugu isuma pilersittarlugu.

Ullutsinni meeqqat inuusuttullu oqaatsit atorlugit ilaatigut internetikkut attaveqatigiittarfitsigullu nunarsuup sinnera oqaloqatigisinnaaginnassanngilaat. Oqaatsit aamma atortussaavaat siunissamut piareersarnermut – oqaatsitigummi piginnaasaqarluarneq periarfissarpassuarnik ammaassissammat - minnerunngitsumik ilinniartitaanerp iluani.

Soorlu siunnersuuteqartup ilisimagaa, aamma oqallinnerup siuliani eqqaaneqareersutut Naalakkersuisut suleqatigiissitamik immikkut ilisimasalinnik nunanit assigiinngitsuneersunik inuttalimmik pilersitsisimapput taakkualu innersuussusiussapput qanoq iliorluta oqaatsinik ilinniartitsinerput pitsanngorsarlugulu ineriartortissagipput taamaalilluta meeqqat inuusuttullu oqaatsinik pigiliussisarnerat nukittorsarlugu.

Taamaattumik pinaasernermik peqquteqanngilluinnarpoq Naalackersuisuniit tuluttut atuartitsineq pillugu aalajangernissaq 2018-imi upernassamut kinguartinneqassasoq siunnersuutigigutsigu. Taamanikkussamut neriunarpoq qanoq iliorluta allamiut oqaasii kisiisa pinnagit siunissami iliussissavut iluarsartuussinnaanerivut aammali qanoq ilitsoqqussaralugu atuartitsinerup nukittorsarlugulu inerisarneqarnissaanut pitsaanerungaartunik aalajangernissamut tunngavissaqalissasugut.

Taamaattumik Naalackersuisut inassutigaat siunnersuut itigartitsissutigineqassasoq – imaanngitsoq allamiut oqaasiisa nukittorsarneqannginnissaat isumagigipput – akertianilli tunngavissaqarluarnerorusukkatta aaqqiissutissanik maanna siunissamilu meeqqanut atuartunut iluaqutaajumaartussanik.

Oqallilluarisi.